

Iluarsiissutit

Siunnersuummut 1. juni 2026-Immersumut taarsiissut

Peqqinnissaqarfimmi sulisut naleqquttumik ilinniaqqissimasut peqqinnissaqarfiup qanoq pigiinnarnerusinnaanerai, ataqatigiittumillu qanoq atorsinnaanerai pillugit nassuiaasiornissaannik, tassungalu atasumk iliuusissatut pilersaarusiornissaannik, Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Pipaluk Olsen, Demokraatit)

Akissuteqaat

(Peqqissutsimut Inunnullu Innarluutilinnut Naalakkersuisoq)

Siullermeerineq

Siunnersuuteqartoq Pipaluk Olsen, nassuiaasiornissamik tamatumunngalu atatillugu iliuusissatut pilersaarusiornissamik Naalakkersuisut piumaffigineqarnissaannut aalajangiivigisassanngorlugu siunnersuutaa pillugu, Naalakkersuisut qutsavigaat.

Siunnersuuteqartup sulisut naleqquttumik ilinniaqqissimasut Peqqinnissaqarfimmit akulikitsumik suliuunnaartarnerat imaluunniit sulinerminni piginnaasarilikkaminnik killilimmik atuisinnaasarnerat saqqummiuppaa. Naalakkersuisut Peqqinnissaqarfimmit ilisimatitsissutaasut tunngavigalugit nalinginnaasumik taamaattoqarnera ilisarissinnaanngilaat. Taamaakkaluartoq Peqqinnissaqarfimmit tamanna annertuumik ukkanneqartariaqarpoq.

Piginnaasat nutaat Peqqinnissaqarfimmi pisortaqarfinnilu allani soorlu kommunini atorneqarluarsinnaapput. Taamatut nuttartarneq aalaakkaasunik sulisoqarsinnaannginnermik ersersitsinerusariaqanngilaq, peqqinnissamulli tunngatillugu ilinniagaqassutsikkut piginnaasat suliffeqarfiit akimorlugit pingaaruteqarlutillu piumaneqarnerannik takussutissiisinaalluni.

Aalaakkaasunik sulisoqarnissaq piginnaasanillu nutaanik atuinissaq sulisoqarnermut politikkimut pingaarnermut inerisaanernullu suliniutinut ilaatillugu Peqqinnissaqarfik suliniuteqarpoq. Tamatumunnga atatillugu najukkani piginnaasatigut inerisaanissamik nukittorsaanissaq ilinniagaqassutsimillu qaffassaanissaq siunertaralugu peqqinnissamut tunngatillugu kandidatinnngorniarnertit nutaat inerisarneqarput. Tamatuma saniatigut Ilisimatusarfik oktober 2026-miit Aliasuuteqartunut siunnersortitut diplomimik ingerlatsivik neqeroorutigilerpaa, tamannalu ilaatigut peqqinnissaqarfimmi sulisunut sulinermi piginnaasatigut qanimut neqeroorutitut ilaavoq taamaalillunilu piginnaasatigut inerisarnissamut aalaakkaasunillu sulisoqarnissamut tapertaataassalluni.

Aalaakkaasunik sulisoqarnissaq unamminartuunera pissutigalugu sulii allanik aqqissuussaasunik periusissiortoqarnissaanit pisariaqartitsisoqarpoq. Piginnaasatigut ineriartornissamut periarfissat ersarissarneratigut aamma ilinniagalittut piginnaasatigullu inerisarnissamut periarfissat ersarissut aalaakkaasunik sulisoqarnissamut qulakkeereqataasinnaapput. Peqqinnissaqarfimmi pitsaassutsimut immikkoortoqarfimmik nutaamik pilersitsinikkut ilinniarnermik, pitsaassutsumik ineriartortitsinermik aamma napparsimasut naammagittaalliuutaannit taarsiiffigitinnissamullu tunngatillugu sulianit kiisalu napparsimasut ilungersunartumik aqqusaagaannit misilittakkat katersorneratigut

atorneratigullu aaqqissuussaasumik peqqinnissaqarfimmi immikkoortortaqrarfiit akimorlugit suliatigut piginnaasanik atuinissamut ikorfartuutaassapput. Tassunga ilanngunneqassaaq atuisunik misissuineq, taannalu napparsimasup peqqinnissaqarfimmi misigisai pillugit ilisimasanik pingaarutilinnik tunniusseqataassaaq. Tamanna ataatsimut isigalugu piginnaasatigut inerinneqarnissamut suli annerusumik siunnerfeqarnerusumik aamma suliut piginnaasai suli annerusumik atorneqarnissaannut ulluinnarnilu tunngaviusumik inerinneqarnissaannu tapertaataassallutik.

Naalakkersuisut naliliinerat naapertorlugu toqqammavissat suliniutillu pioreersut aalajangiivigisassatut siunnersuutip siunertaanik annertuumik ikorfartuippat. Nassuiaasiornissamut iliuusissatullu pilersaarusiornissamut taarsiullugu Naalakkersuisut siunnersuutigaat periusissiorinnikkut ersarinnerusumik suliniuteqaqqinnissaq, tamannalu peqqinnissaqarfimmi ulluinnarni suliut ilinniartinneqarnerat piginnaasaanillu ineriartortinneqarnerat nukittorsarneqarnissaanut atorneqassaaq peqqinnissaqarfillu aqqutigalugu suliffissat sorliit ilinniaqqinnissamut atorneqarsinnaanersut ersarissarlugit. Tamanna tunngavigalugu Naalakkersuisut allannguutissatut siunnersuutigaat:

Peqqinnissaqarfimmi annertunerusumik attassisinnaaneq aamma suliut piginnaasaanik aaqqissuusaanerumik atuisinnaaneq ukkataralugit, Nunatsinni Peqqinnissaqarfimmi ilinniartitaanermut pisinnaasanullu periusissiaq aallartinnissaanut, Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.